

Embargo: Hanya boleh diterbitkan atau disebarikan mulai jam 1200, Khamis, 12 Jun 2025



## KENYATAAN MEDIA

KEMENTERIAN EKONOMI  
JABATAN PERANGKAAN MALAYSIA

Blok C6 & C7, Kompleks C,  
Pusat Pentadbiran Kerajaan Persekutuan, Presint 1,  
62514, Wilayah Persekutuan Putrajaya  
No. Telefon : 03 - 8090 4681

### PERANGKAAN GETAH BULANAN, MALAYSIA

APRIL 2025

#### **Pengeluaran getah asli Malaysia menurun 37.3 peratus pada April 2025**

**PUTRAJAYA, 12 JUN 2025** – Jabatan Perangkaan Malaysia (DOSM) telah menerbitkan **Perangkaan Getah Bulanan, Malaysia, April 2025**. Penerbitan ini memaparkan statistik pengeluaran, import, eksport, penggunaan domestik, stok, harga, bilangan pekerja, gaji & upah dan produktiviti bagi estet getah.

Ketua Perangkawan Malaysia, Dato' Sri Dr. Mohd Uzir Mahidin berkata, pengeluaran getah asli menurun 37.3 peratus pada April 2025 (18,008 tan metrik) berbanding pada Mac 2025 (28,739 tan metrik). Perbandingan tahun ke tahun menunjukkan pengeluaran getah asli menurun 15.6 peratus (April 2024: 21,325 tan metrik). Pengeluaran getah asli Malaysia pada April 2025 disumbangkan terutamanya oleh sektor pekebun kecil (86.0%) berbanding sektor estet (14.0%).

Jumlah stok getah asli pada April 2025 menurun 6.7 peratus kepada 203,728 tan metrik berbanding 218,253 tan metrik pada Mac 2025. Kilang pemproses getah menyumbang stok akhir sebanyak 87.6 peratus diikuti kilang pengguna getah (12.3%) dan estet getah (0.1%).

Eksport getah asli Malaysia berjumlah 35,901 tan metrik pada April 2025, menurun 31.7 peratus berbanding Mac 2025 (52,531 tan metrik). China terus kekal sebagai destinasi utama untuk eksport getah asli iaitu berjumlah 33.3 peratus daripada jumlah keseluruhan eksport pada April 2025 diikuti Emiriah Arab Bersatu (14.9%),

Jerman (14.2%), India (6.5%) dan Amerika Syarikat (5.1%). Prestasi eksport disumbangkan oleh produk berasaskan getah asli seperti sarung tangan getah, tayar, tiub dan benang getah. Produk sarung tangan getah merupakan eksport utama dengan nilai sebanyak RM1.1 billion pada April 2025, menurun 19.2 peratus berbanding Mac 2025 (RM1.3 billion).

Analisis perbandingan harga purata bulanan menunjukkan Lateks Pekat merekodkan penurunan iaitu 7.0 peratus (April 2025: 647.20 sen sekilogram; Mac 2025: 696.05 sen sekilogram) manakala Sekerap menurun sebanyak 15.8 peratus (April 2025: 641.27 sen sekilogram; Mac 2025: 761.92 sen sekilogram). Trend harga bagi semua jenis Getah Mutu Malaysia (G.M.M) pula menurun antara 6.9 peratus dan 13.5 peratus. *The World Bank Commodity Price Data* melaporkan harga bagi getah jenis TSR 20 (*Technically Specified Rubber*) menurun 13.9 peratus (daripada USD1.98/kg kepada USD1.71/kg) dan SGP/MYS (Singapura/Malaysia) menurun 10.1 peratus (daripada USD2.36/kg kepada USD2.13/kg).

Menurut *Malaysia Rubber Board Digest* keluaran April 2025, Pasaran Getah Kuala Lumpur mengalami trend penurunan dan pemulihan yang bercampur-campur sepanjang April 2025, dipengaruhi oleh isyarat turun naik daripada pasaran hadapan getah serantau sebagai tindak balas kepada ketidaktentuan dasar perdagangan Amerika Syarikat. Sentimen pasaran kekal lemah dalam keadaan ketidaktentuan ekonomi global yang berterusan dan peningkatan ketegangan perdagangan antara China dan Amerika Syarikat. Di samping itu, ringgit yang lebih kukuh berbanding dolar Amerika Syarikat dan kemerosotan harga minyak mentah terus menjejaskan sentimen.


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

**Carta 1: Pengeluaran dan penggunaan domestik bagi getah asli April 2024, Mac - April 2025**  
(‘000 tan metrik)



**Carta 2: Import dan eksport bagi getah asli April 2024, Mac - April 2025**  
(‘000 tan metrik)



Dikeluarkan oleh:

**PEJABAT KETUA PERANGKAWAN MALAYSIA**  
**JABATAN PERANGKAAN MALAYSIA**  
**12 JUN 2025**